



Na osnovu člana 27. stav 1. alineja 6. i člana 37. Stav 2) Zakona o ustanovama („Službeni list RBiH“, broj 6/92, 8/93 i 13/94), člana 36. tačka (f) Pravila Javne ustanove „Pozorište mladih“ Sarajevo (broj: 90-02-2-1/17 od 12.04.2017. godine i 43-04-1/21 od 26.02.2021. godine i broj: 63/04-02/23 od 10.02.2023.godine) Upravni odbor na sjednici održanoj 15.02.2024.godine, donosi:

## PRAVILNIK

o uslovima sklapanja sporazuma o poslovno - tehničkoj saradnji za korištenje resursa JU  
“Pozorište mladih” Sarajevo

### Član 1.

(Predmet Pravilnika)

- (1) Ovim Pravilnikom se propisuju uslovi i postupci za korištenje, na određeno vrijeme, resursa JU “Pozorište mladih” Sarajevo (u daljem tekstu Pozorište), od strane zainteresovanih institucija i organizacija iz oblasti kulture i javnog djelovanja.
- (2) Sporazumom o poslovno - tehničkoj saradnji definiće se obaveze Pozorišta u pružanju tehničke i kadrovske podrške za korištenje resursa.
- (3) Bilo koji Sporazum o poslovno - tehničkoj saradnji neće ugroziti planirane aktivnosti Pozorišta.

### Član 2.

(Sporazum o poslovno - tehničkoj saradnji)

- (1) Pozorište zaključuje Sporazum o poslovno - tehničkoj saradnji (u daljem tekstu Sporazum) sa korisnikom resursa (u daljem tekstu Korisnik) sa institucijom, odnosno organizacijom koja ima svojstvo pravnog lica.
- (2) Prije potpisivanja Sporazuma, Korisnik će Pozorištu predložiti projekat, u sklopu kojeg će se koristiti resursi Pozorišta, čiji programski sadržaj promoviše umjetnost, kulturu, obrazovanje, društveni aktivizam.
- (3) Odredbama ovog Pravilnika nije obuhvaćena poslovna saradnja sa pravnim licima u cilju zaključivanja ugovora za gostovanja, ugovora o koprodukciji i ugovora o umjetničkoj saradnji.

### Član 3.

(Sadržaj Sporazuma)

- (1) Sporazum se zaključuje u pisanom obliku i na određeno vrijeme.

(2) Sporazum, između ostalog sadrži:

- a) strane koje potpisuju Sporazum (Pozorište i Korisnik),
- b) opis projekta, odnosno manifestacije koji su predmet Sporazuma,
- c) cijenu i način plaćanja,
- d) obaveze Pozorišta vezano za realizaciju projekta, odnosno korištenje resursa (tehnička, kadrovska podrška i dr.),
- e) obaveze Korisnika,
- f) trajanje korištenja resursa,
- g) izmirenje eventualno nastale štete prilikom korištenja resursa,
- h) odredbe o prestanku Sporazuma,
- i) odredbe o rješavanju sporova,
- j) elementi ugovora kojim se definišu autorska i ostala prava učesnika projekta ili manifestacije koji su predmet Sporazuma.

(3) Direktor Teatra izvještava Upravni odbor o zaključenom Sporazumu sa osnovnim elementima istoga.

#### Član 4.

##### (Cijena korištenja resursa)


- (1) Prilikom određivanja cijene za korištenje resursa vodiće se računa da cijena ne smije biti niža od troškova koji će nastati tokom realizacije projekta.
- (2) Konačna cijena će se utvrditi u skladu sa Pravilnikom o načinu prodaje i cijenama ulaznica, iznajmljivanja velike i male scene i utvrđivanja kriterija za dodjelu pozivnica i besplatnih ulaznica.
- (3) Konačnu cijenu za svaki Sporazum odrediće Direktor Pozorišta uz konsultacije saradnika iz Pozorišta vodeći prije svega računa o interesima Pozorišta.

#### Član 5.

##### (Korištenje resursa bez naknade)

Pozorište može ustupiti resurse bez naknade u sljedećim slučajevima:

- a) manifestacije u organizaciji osnivača, Vlade Kantona Sarajevo,
- b) za održavanje Internacionalnog Pozorišnog festivala MESS,
- c) manifestacije u organizaciji državnih organa Bosne i Hercegovine i Federacije Bosne i Hercegovine.



- d) Direktor Pozorišta može izdati salu bez naknade ukoliko procijeni da je to svrsishodno u promotivnom interesu Pozorišta ili da izdavanje sale bez naknade ima širi značaj za kulturu i edukaciju, te predstavljanje domaće kulture na internacionalnom planu, podizanje kvaliteta kulturne industrije i produkcije, umjetničkog kvaliteta od šireg značaja za domaću i internacionalnu kulturnu baštinu i savremene tokove, promociju i podršku mladih kreativnih projekata iz oblasti kulture i vizuelno-izvođačkih umjetnosti.
- e) Direktor Pozorišta može izdati salu bez naknade ukoliko ocjeni da se radi o komercijalnom projektu u kojem se očekuje tolika posjećenost da Pozorište od prodaje karata može doći do odgovarajuće zarade.

#### Član 6.

(Raskid Sporazuma)

Pozorište može jednostrano raskinuti Sporazum ukoliko Korisnik:

- a) ne ispuni obaveze ili prekrši odredbe Sporazuma,
- b) otkáže realizaciju projekta/manifestacije usljed nepredviđenih okolnosti,
- c) nanosi štetu Pozorištu u vidu negativnog istupa u medijima,
- d) vrši zloupotrebu marketinških prostora Pozorišta.

#### Član 7.

(Obaveze Korisnika)

Korisnik je dužan pridržavati se kućnog reda za vrijeme realizacije projekta i u potpunosti se pridržavati rasporeda rada u Pozorištu.

#### Član 8.

(Stupanje na snagu)

Ovaj Pravilnik stupa na snagu danom donošenja i objaviće se na web stranici Pozorišta i oglasnoj tabli Pozorišta.

Broj: 04-2-143-7/24

Sarajevo, 15.02.2024.

Predsjednica Upravnog odbora:

Tatjana Šojić

